



DRAČINA JE

č. 11

- a) samotwarjena korejta
- b) strašne napinanje, robota
- c) žona, kiž mi stajnje na čuwy dže

Prawa je wotmołwa **b**.

Dračina je napinanje, kotrež husto samo mocy přesahuje. Hač džěło abo sportowe wužadanje – napinaca dyrbi wěc być, zo bychmy dračina prajili. Tež ćežke žiwjenje z lutym džěłom a bědu móže dračina być.

Takle móžeš tež prajić:

- próca, napinanje
- nuza, běda, horjo, kwakla

Připódla prajene:

Ze słowom drač njezwjazujemy přijomne mysle. Drač prajimy tež na čerta. Koči drač je něchtó, kotryž zwěrjata čwěluje. Ludźidrač je něchtó, kotryž ludźi čwěluje. Muž z powołanjom drača bě lětstotki dołho za wotstronjenje zahinjenych skoćatow zamołwity.

Přikłady z rěčneho korpusa:

W šesćich pak bě hižo stawanje a rańši sport. To bě ći *dračina*.

(Beno Budar, *W susodstwie makrelow*. Budyšin 1979)

Jakub a Jan jědzetaj z tandemom nahłu horu horje. Skónčnje staj dojětoj, a Jan praji:

»To bě ći *dračina* z tym teptanjom.« Na to měni Jakub, kiž sedžeše zady: »A za mnje hakle! Hdyž njebych stajnje borzdził, bychmoj tola wróćo jětoj!« (Płomjo 2007)

Druhdy ći wjeselo čini, zwjetša so z nim dračuješ. Za wjeselo mało mocow trjebaš, za *dračinu* wjele. (Rozhlad 1996)